

Тропарь, глас 4:

Иже во огни купины неопалимая, древле Моисеем виденная, / тайну воплощения Своего от неискусобрачнныя Девы Марии Прообразовавый, / Той и ныне, яко чудес Творец и всея твари Создатель, / икону Ея святую чудесы многими прослави, / даровав ю верным во исцеление недугом / и в защищение от огненнаго запаления. / Сего ради вопием Препоблагословенней: / надеждо христиан, от лютых бед, огня и грома избави на Тя уповающия // и спаси души наша, яко милосерда.

Ин тропарь, глас 4:

Иже в купине, огнем горящей и негоряемой, / показавый Моисею Пречистую Твою Матерь, Христе Боже, / Огонь Божества неопальне во чреве приемшую, / и нетленну по Рождестве пребывшую: / Тоя молитвами пламене страстей избави нас, / и от огненных запалений град Твой сохрани, // яко Многомилостив.

Кондак, глас 8:

Предочистим чувства душ и телес наших, / да видим таинство Божественное, / образно явленное древле великому во пророцех Моисею купинию, / горевшею огнем и не сгаравшею, / в нейже Твоего безсеменнаго Рождества, Богородице, предвозвещание исповедуем, / и, благоговейно поклоняющися Тебе / и Родшемуся от Тебе Спасу нашему, со страхом вопием: // радуйся, Владычице, Покрове, и Прибежище, и Спасение душ наших.

Молитва первая

Царице Небесная, Владычице наша, Госпоже Вселенная, Пресвятая Богородице, нескверная, неблазная, нетленная, пречистая, чистая Приснодево, Марие Богоневесто, Мати Творца твари, Господа славы и Владыки всяческих! Тобю Царь царствующих и Господь господствующих прииде и на земли нам явися. Ты убо Божие милосердие воплощенное. Ты Мати Света и Живота сущи, якоже некогда во чреве Твоем носила еси Его и

на объятіих Твоіх имела еси Младенца Слово Превечное, Бога, тако и всегда Того с Собою имаши. Сего ради мы по Бозе к Тебе прибегаем, яко к нерушимей стене и предстательству: призри благосердием, всепетая Богородице, на лютое озлобление наше и исцели душ и телес наших болезни: отжени от нас всякаго врага и супостата, избави от глада, мора, от язвы, от вод многих и воздухов тлетворных, и от смерти внезапная; и якоже три отроки в пещи вавилонстей, сохрани и соблюди нас, да якоже древле людем Божиим, тако будут вся благая нам чтущим Тя; врази же и вси ненавидящи нас да постыдятся и посрамятся, и уразумеют вси, яко с Тобою Господь, о Владычице, и Тобою с нами Бог. Во дни осени нас сению благодати Твоея, во тьме же ночней просвети светом свыше, всем полезная устрояючи: преложь горесть нашу во сладость и слезы утри согрешивших и бедствующих раб Твоих, исполняючи коегождо прошения вся во благо; вся бо можеш, елика хочеш Ты, Мати Слова и Живота. Тебе Отец венча Дщерь, Сын Матерь Деву, Дух Святой Невесту, да царствуеш яко царица, предстоящи одесную Святыя Троицы, и милуеш нас якоже хочеш, ныне и присно и во веки веков. Аминь.

Молитва вторая

О, Пресвятая и Преблагословенная Мати Сладчайшаго Господа нашего Иисуса Христа! Припадаем и поклоняемся Тебе пред святою и пречестною иконою Твоею, еюже дивны и преславны чудеса содеваеши, от огненного запаления и молниеноснаго грома жилища наша спасавши, недужныя исцеляеши и всякое благое прошение наше во благо исполняеши. Смиренно молим Тя, всесильная рода нашего Заступнице, сподоби ны немощныя и грешныя Твоего Матерняго участия и благопопечения. Спаси и сохрани, Владычице, под кровом милости Твоея Церковь Святую, обитель сию, всю страну нашу православную, и вся ны припадающия к Тебе с верою и любовью, и умиленно просящия со слезами Твоего заступления. Ей, Госпоже Всемилостивая, умилосердися на нас, обуреваемых грехами многими и не имущих дерзновения ко Христу Господу, просити Его о помиловании и прощении, но Тебе предлагаем к Немю на умоление Матерь Его по плоти: Ты

же, Всеблагая, простри к Нему Богоприимнии руки Твои и представствуй за нас пред Благостию Его, просяще нам прощения прегрешений наших, благочестного мирного жития, благия христианския кончины, и добраго ответа на страшнем Суде Его. В час же грозного посещения Божия, егда огнем возгорятся дома наша, или молниеносным громом устрашаеми будем, яви нам милостивное Твое заступление и державное вспоможение: да спасаеми всесильными Твоими ко Господу молитвами временнаго наказания Божия zde избежнем и вечное блаженство райское тамо унаследуем: и со всеми святыми воспоем Пречестное и Великолепное имя поклоняемые Троицы, Отца и Сына и Святого Духа, и Твое велие к нам милосердие, во веки веков. Аминь.

Молитва третья

О, Пресвятая Дево, Мати Господа Вышняго, Заступнице и Покровительнице всех, к Тебе прибегающих! Призри с высоты святая Своея на мя грешнаго, припадающаго к чудотворному лику Твоему: услыши мою смиренную молитву и принеси ю пред возлюбленнаго Сына Твоего, Господа нашего Иисуса Христа: умоли Его, да просветит мрачную мою душу светом Божественныя благодати Своея, да избавит мя от всякия нужды, скорби и болезни, да ниспослет мне тихое и мирное житие, здравие телесное и душевное, да успокоит страждущее сердце мое и исцелит раны его, да вразумит мя на добрыя дела, очистит ум мой от помышлений суетных, наставит мя ко исполнению заповедей Своих, избавит от вечныя муки и не лишит Своего Небснаго Царствия. О, Пресвятая Богородице, Ты — “всех скорбящих Радосте”, услыши и мя скорбнаго. Ты, — именуемая — “Утоление печали”, утоли и мою печаль. Ты — “Купина неопалимая”, сохрани мир и всех нас от вредоносных, огненных стрел врага. Ты — “Взыскание погибших”, непусти и мне погибнуть в бездне грехов моих. На Тя по Бозе вся моя надежда и упование! Буди мне Покровительницею в жизни временной и вечной и Ходатаицею пред возлюбленным Сыном Твоим, Господом нашим, Иисусом Христом. Научи мя служити Ему с верою и любовью и благоговейно чтити Тебе, Пресвятая Мати Божия, Преподобная Марие! Твоим святым молитвам вручаю себе до скончания дней моих. Аминь.

Молитва четвертая

О, Пресвятая Деве Мати Господа, Царице Небес и земли! Вонми многоболезненному вздыханию души нашей, призри с высоты святыя Твоея на нас, с верою и любовью поклоняющихся пречистому образу Твоему. Се бо грехми погружаеми и скорбями обуреваемии, взирая на Твой образ, яко живей Ти сущей с нами, приносим смиренныя моления наша. Не имамы бо ни инья помощи, ни иного предстательства, ни утешения, токмо Тебе, о, Мати всех скорбящих и обремененных. Помози нам немощным, утоли скорбь нашу, настави на путь правый нас, заблуждающих, уврачуй и спаси безнадежных, даруй нам прочее время живота нашего в мире и тишине проводить, подаждь христианскую кончину, и на страшнем суде Сына Твоего явися нам милосердия заступница, да всегда поем, величаем и славим Тя, яко благою Заступницу рода христианского, со всеми угодившими Богу. Аминь.

О, Мати Божия Неопалимая Купина, заступи мя от людской напасти, от панской карности, от неугасимого огня, от наглой смерти, от вечной муки и скрой ризою Своей Небесной мя. Аминь.

Величание

Величаем Тя, / Пресвятая Дево, / Богоизбранная Отроковице, / и чтим образ Твой святой, / имже точиши исцеления // всем с верою притекающим.